

Siunnersuut uunga: Siusinaartumik pensionisiat pillugit Inatsisartut inatsisaata allanngortinneqarnera pillugu Inatsisartut inatsisaat nr XX, XX XXX 2017-imeersoq (Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoq)

Saqqummiussissut

(Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoq)

1. Siullermeerneqarnera

Siusinaartumik pensionisiat pillugit Inatsisartut inatsisaata allanngortinneqarnera pillugu Inatsisartut inatsisissaattut siunnersuut Naalakkersuisut matumuuna saqqummiutissavaat

2015-imi Inatsisartut siusinaartumik pensionisiaqarnermut tunngasut annertuumik iluarsaateqqinneqarnissaat akuersissutigaa. Iluarsaaqinnikkut ilaatigut siunertarineqarpoq siusinaartumik pensionisiallit amerlanerusut suliffeqaratik pilersugaanerminniit suliffeqarlutik inuulernissaminnut periarfissaminnik atuilernissaat. Siusinaartumik pensionisialippaalussuit suli sulisinnaassuseqarput inuiaqatigiinnut iluaqutaasumik atorsinnaasaminnik. Suliffeqarnermut aalajaatsumik ataavartumillu attuumassuteqarnermut periarfissaqarnikkut siusinaartumik pensionisiallit amerlasuut inuunermikkut atukkatik inuunerminnilu nalillit pitsanngoriarnerat misigissavaat. Suliffeqarnermut pitsaanerusumik ataavannerusumillu attaveqarneq, ulluinnarni aalajaanneruneq meeqqanullu ulluunerani paaqqinniffinnut atuarfimmullu aalajaannersumik attaveqarneq, inuttut atugarisanik kingornussat ajortut annikillisarnerannut aamma sunniuteqaqataasinnaassaaq.

Peqatigitillugu pisariaqartitsinerpaaginnaat siusinaartumik pensionisiaqartariaqarput, inuillu nammineersinnaasut siusinaartumik pensionisiaqartitaanatik.

Inatsisartut inatsisaata akuersissutigineqarneranut atatillugu aalajangiisoqarpoq iluarsaaqqinnerup atuutilersikkiartorneqarnera kingunerisinnaasaalu malittareqqissaarneqassasut. Siusinaartumik pensionisiat pillugit malittarisassanik ingerlaavartumik nalilersuisarnermut atatillugu paasinarsisimavoq inatsit iluarsisassartaqartoq taamaalilluni inatsisitigut siunertarineqartut anguniagaasullu isumannaarneqassammata.

Arlalinninngaanniit ersarissarneqartarpoq nikanarsaanerusoq pissusissamisuunngitsorlu siusinaartumik pensionisiallit sanngiinnerpaat amerlaqisut, sulisinnaassuseqanngitsut taamaalillutillu inuussutissarsiornermikkut nammineerlutik isertitaqartanngitsut aapparissamik isertitarisartagaanik pilersuiumassuseqarneranillu tamakkiisumik isumalluuteqartarmata. Inuiaqatigiinni nutaaliaasuni aappariit inooqatigiillu akornanni naligiissitaaffiusuni tamanna pissusissamisuunngilaq.

Taamaammat siunnersuutigineqarpoq siusinaartumik pensionisiallit aningaasarsiorfeqanngitsut imaluunniit nammineerlutik sulinerikkut annikitsuaraannarnik isertitaqartartut utoqqalinersiat pillugit aaqqissuussisimanertulli siusinaartumik pensionisiat tunngaviusumik aningaasartaannik qulakkeerinniffiqineqassasut, - tunngaviusumik aningaasartat siusinaartumik pensionisiallip nalunaarsukkatigut aapparisaata inooqatigisaataluunniit piffissami pineqartumi ataatsimut isertitarisartagaasa annertussusii apeqqutaatinnagit. Taamaaliorneq utoqqalinersianik iluarsaaqqinnermi siunertarineqartunut naapertuuppoq, tassani tunngaviusumik utoqqalinersiaqartitsisoqartalerma, aapparisaap isertitarisartagai apeqqutaatinnagit.

Tamakku saniatigut iluarsilaagassarpaaluit siunnersuutigineqarput.

Siusinaartumik pensionisiat pillugit inatsimmi siullermi siusinaartumik pensionisiallit siusinaartumik pensionisiallip kisermaap siusinaartumik pensionisiaasa 20 procentiinik tamatigut pisinnaatinneqarput, allanik isertitaqartarneq apeqqutaatinnagu (20 procentinik malittarisassaartitsineq). Kisiannili 20 procentinik malittarisassat siusinaartumik pensionisiat pillugit Inatsisartut inatsisaanni atuuttumi ikaarsaariarnermut aalajangersakkani ingerlateqqinneqarsimanngillat.

Pissusissamisoortutut isigineqarsinnaanngilaq siusinaartumik pensionisiallit ikaarsaariarnermi aaqqissuussinnermit siusinnerusumiit ajornerusunik atugassaqartitaanissaat. Taamatuttaarmi ikaarsaariarnermik aaqqissuussinnermi siusinaartumik pensionisiallit nammineerlutik isertitaqartanngitsut sulisinnaassuseqanngitsullu inooqatigisamik isertitarisartagaanik pilersuuumassuseqarneranillu isumalluuteqartariaqanngillat.

Taamaammat siunnersuutigineqarpoq 20 procentinik malittarisassaqarnermik taaneqartartup atorneqaleqqinnissaa, taamaalilluni siusinaartumik pensionisialik aapparisaami isertitarisartagai apeqqutaatinnagit siusinaartumik pensionisiat 20 %-iinik pissarsisarniassammat.

Tamakku saniatigut siunnersuummiipput angalanermi aningaasartuutit matussuserneqartarnissaannut ataasiartumik ikiorsiisarnermut erseqqissaatit, taamaalilluni taamaallaat Kalaallit Nunaanni angalanernut taamaalillunilu Kalaallit Nunaata avataani ornitanuunngitsoq ikiorsiisoqarsinnaassammat.

Taamatut oqaaseqarlunga siunnersuut matumuuna Inatsisartunut akuersaallaqqullugu suliassanngortippara.